

# 開放文學 – 歷代筆記 – 夷堅丙志 第八卷

無足婦人 關子東·說其兄博士演·在京師·見婦人丐於市·衣敝體垢·無兩足·但以手行·而容貌絕冶·有朝士見而悅之·駐馬問曰·汝有父母乎·曰·無·有烟戚乎·曰·無·能縫衽乎·曰·頗亦能之·朝士曰·與其行乞棲棲·孰若為人妾·斂眉歎曰·形骸若此·不能自料理·若為婢子·則役於人者也·安能使人為己役乎·且誰肯用之·士歸語其妻·妻亦惻然·取致其家·為之沐浴更衣·調視其飲食·授以針指·敏捷工致·一家憐愛焉·士亦稍與之昵·居一年許·出遊相國寺·遇道人·駭曰·子妖氣甚盛·奈何·士以為誑已·怒不應·異日再見曰·崇急矣·子其實語我·我無求於子也·家豈有古器若折足鑄鼎之屬乎·曰·無之·問不已·士不能掩·始以妾告·曰·是矣是矣·亟避之·明日宜馳往百里外·藉使不能及·姑隨日力所至托宿·深關固拒·中夜聞扣戶者·無得開·或可以免·舍是無策也·士始怖·不謀於家·假良馬·盡日極行·逼暮舍於逆旅·歇未定·道上塵起·旗幟前驅·一偉丈夫乘黑馬亦詣焉·長揖而坐·指一房相對宿·略不交談·士愈懼·閉戶不敢寢·夜艾·外間疾呼曰·君家忽值喪禍·令我持書來·時燈火尚存·自隙窺覘·乃無足婦人·負兩肉翼·翼色正青·士駭汗如雨·偉人遽撤關出·揮劍擊之·婦人長嘯而去·明旦·士起見偉人·拜而謝之·曰·微尊官·吾不知死所矣·敢問公為誰·曰·子識我乎·乃相國寺道人也·曩固告子矣·我即子之本命神·以子平生虔心奉我·故來救護·言訖與車馬皆不見·

胡秀才

姜補之師仲在太學·與胡秀才同舍·胡指上病贅疣·欲灼艾去之·或告曰·今日人神在指·當俟他日·胡不以為信·遂灸焉·七日而創發·皮剝去一重·見人面在中·如鏡所照·惡之·亟覆以膏·又七日稍愈·癢甚·因爬搔皮起·人面如故·歷四十餘日·創益大且痛·竟不起·

趙士過

武功大夫合門宣贊舍人黃某·為江東兵馬鈐轄·紹興二十二年正月·秩滿·將歸弋陽·過池州·值雪小留·郡守假以教授廨舍·遇舊同官趙士過·趙訝其顏色青黑·而效不已·語言動作·非復如疇昔時·從容問所苦·黃愀然久之·曰·吾家不幸祖傳瘵疾·緣是殞命者·世世有之·自半年來·此證已萌芽·吾次子沉亦然·殆將死矣·遂悲傷出涕·趙曰·每聞此疾可畏·間亦有愈者·而不能絕其本根·吾能以太上法篆治之·但慮人不知道·因循喪軀·公果生信心·試為公驗·於是焚香書符·以授黃及沉·使吞之·未久·遍手指內外皆生黃毛·長寸餘·趙曰·疾深矣·稍復遷延·當生黑毛·則不能救療·今猶可為也·於是擇日·別書符·牒城隍·申東嶽·奏上帝詔·令黃君掃掃寓舍之西偏小室·紙糊其中·置石灰於壁下·設大油鼎一枚·父子著白衣·閉門對床坐·吞符訖·命數童男秉燭注視·有頃·兩人身中飛出黑花蟬蛾四五·壁間別有蟲·作聲·而出·或如蟋蟀·如蜘蛛·大小凡三十六·悉投沸鼎中·臭不可聞·啾啾猶未止·繼一蟲細如絲髮·蜿蜒而行·入於童袖間·急捕得·亦投鼎中·便覺四體泰然·了無患苦·黃氏舉室歡異·知其靈驗·默禱於天·願為先世因此疾致死者·作九幽大醮救度之·未醮數日·黃之妻夢先亡十餘人·內有衣皂小團花衫者·持素黃篆·白簡來拜謝曰·汝救我·則我救汝妻·覺以告夫·黃泣曰·衣小花衫者·吾父也·吾父死於兵戈中·衣服不備·但得一衫以斂·夢中所見者·真是矣·遂以二月朔·設醮於天慶觀·是夕陰雲四垂·雨意欲作·中夜隱隱聞雷聲·所供聖位茶·皆白如乳·道眾恐雨作·不能焚詞·既而至五鼓·醮事畢·雨乃大至·黃氏歷世惡疾·自此而絕·士過·字進臣·時右朝請大夫魏彥良·通判池州·為作記·

謝七[女更]

信州玉山縣·塘南七里店·民謝七妻·不孝於姑·每飯以麥·又不得飽·而自食白粳飯·紹興三十年七月七日·婦與夫皆出·獨留姑守舍·游僧過門·從姑乞食·笑曰·我自不曾飽·安得有餘·僧指盆中粳飯·曰·以此施我·姑搖手曰·白飯是七[女更]者·我不敢動·歸來必遭罵辱·僧堅求不已·終不敢與·俄而婦來·僧徑就求飯·婦大怒·且毀叱之·僧哀求愈切·婦咄曰·脫爾身上袈裟來·乃可換·僧即脫衣授之·婦反覆細視·戲披於身·僧忽不見·袈裟變為牛皮·牢不可脫·胸間先生毛一片·漸遍四體·頭面半成牛·其夫走報婦家·父母遽至·則儼然全牛矣·今不知存亡·右四事亦得於王日嚴·

白石大王

福州人陳祖安之父·待兗州通判闕·夢黃衣吏持符至·曰·帝命公為白石大王·問所在·曰·今未也·俟公見巨石玷一角·乃當去·及期·復來迎矣·覺而大惡之·後赴官兩月·謁泰山·宿山下一寺·適見庭下大石·其一角正缺·悵然不樂·還郡未久·而黃衣至·遂以其日卒·

莫東得官

吳興莫伯甄·為奉議郎時·三子皆未官·嘗夢以恩澤補第二孫東·寤而喜曰·東於子孫數為第五·吾得以延賞恩及之·足矣·至紹興三十二年·以朝請郎為潼川轉運判官·遇登極·恩·當遣子弟奉表入賀·時長子澄·已登科·仲季以母服不可往·乃命吏持函·空其名·令至吳興以授澄·使自處之·澄長子果·次子東·果讀書頗有聲·謂必能繼取名第·乃以官與東·伯甄聞之·念前夢·憮然不樂·是年以覃恩及磨勘·進秩朝散大夫·不及拜而卒·生前所蒙·但一孫得官爾·右二事文學說·

黃十翁

黃十翁者·名大言·浦城人·寓居廣德軍·紹興二十七年十一月四日·因病久心悸·為黃衣童呼出門·行大衢路·兩旁植垂柳·池水清激可愛·荷花如盛夏時·經十餘里·更無居民·望樓觀嵯峨·金碧相照·童引入門·罪人萬數立廷下·殿上四人·冠通天冠·衣縷金袍·分席而坐·一吏喚黃·大言雲·汝數未盡·誤追汝來·命青衣童引出東門·回顧餘人·已驅之北去·東門外如陽間市肆·往來闐闐·行未遠·別見宮闕甚麗·內外多牛頭阿旁·王者旒冕乘圭坐·威嚴肅然·紫衣吏問曰·汝住世作何因果·對曰·頃歲兵亂時·曾為二寇掠財物·徐就擒捕·保伍欲戮之·大言愍焉·以錢二十千贖其死·及平生戒殺持經造像數十事·俄持巨鏡下照·了無冤業·即令詣總管司照對·總管司之長稱舍之·其副乃廣德出攝吏王珣·與大言素厚·謂之曰·汝當再還人世·若見世人·但勸修善·敬畏天地·孝養父母·歸向三寶·行平等心·莫殺生命·莫愛非己財物·莫貪女色·莫懷嫉妒·莫謗良善·莫損他人·造惡在身·一朝數盡·墮大地獄·永無出期·受業報竟·方得生於餓鬼畜生道中·佛經百種勸戒·的非虛語·又囑曰·為吾口達信於我家·我在公門·豈能無過·但曾出死罪三十一人·有此陰德·故得為神·可造衣服一襲·多誦經文·化錢萬七千貫·具疏奏城隍司·以達我要贖餘過·且言世人以功德薦亡·須憑城隍證明·方得獲福·若歲時殺物命祭祀·亦祖先不享·此二事不可不知·後二日·陰府會善男女於無憂閣下·隨其善行·俾證道果·至於地獄囚人·亦驅至彼·如州郡囚聽赦罪·輕者亦脫苦受生·宜往觀之·至則睹所謂無憂閣者·眾所成·高出雲表·祥光徹天·男女皆在其下·其善者衣服盛麗·持香花經卷·徜徉彩雲之間·玉砌金階之上·而地獄之眾·皆鎖枯囚執·廷劣憔悴·跪伏門外·喜懼相半·方顧視感歎·忽蕩無所睹·王總管雲·已憑今日佛蔭·脫地獄苦然皆失人身矣·回至總管司·見對事者亦眾·其相識者·托為囑子孫·巧功德·所付之語·皆生平閨門隱秘·非外人所得知·事畢·童導之歸·望一鐵山·烈火熾然·燒灸群囚·號叫不絕·又一山·有樹無葉垂植刀劍·囚攀援而上·受剗割之苦·積屍無數·大言合掌誦觀世音地藏二菩薩·忽震雷一聲·二山皆不見·前行過一巖洞·臭河不可近·童子雲·世人棄殘飲食酒茗於溝渠·皆為地神收貯於此·俟其命終·則令食之·又行數里·再至王所·王敕雲·汝還世五年·傳吾語於人間·作善者即生人世·受安樂福·作惡者萬劫不回·受無間苦·令聞此者口口相傳·遂別命一青衣童·引出長春門·有花如初·過橋失足而寤·已初八日矣·黃翁時年八十五·崇仁縣主簿秦絳為作記·

## 衡山民

幹道初·元衡山民·以社日祀神·飲酒大醉·至暮獨歸·跌於田坎水中·恍忽如狂·急緣田塍行·至其家·已閉門矣·扣之不應·身自從隙中能入·妻在床績麻·二子戲於前·妻時時咄罵其夫暮夜不還舍·民叫曰·我在此·妻殊不聞·繼以怒罵·亦不答·民驚曰·得非已死乎·遽趨出·經家先香火位過·望父祖列坐其所·泣拜以告·父曰·勿恐·吾為汝狻土地·即起·俄土地神至·布衫草履·全如田夫狀·具問所以·顧小童令隨民去·童禿髮赤腳·類牧牛兒·相從出門·尋元路·復至坎下·教民自抱其身·大呼數聲·蹶然而寤·時妻以夫深夜在外·倩鄰人持火炬求索之·適至其處·遂與俱歸·子婦姪張寅說·

## 頂山回客

平江常熟縣僧慈悅·結庵於縣北頂山絕巘·白龍廟之傍·凡三十餘年·以至誠事龍·得其歡心·有禱必應·邑人甚重之·紹興三十二年·年七十八矣·忽得蠱病·水浮膚革間·累月不瘳·朝夕呻吟·殆無生意·棺衾皆治辦·待盡而已·一客不知從何來·戴碧紗方頂巾·著白苧袍·眉宇軒昂·與常人異·自山下至龍祠禮謁·因歷僧舍·見慈悅病·問之曰·病幾何時矣·此乃水腫·吾有藥能療·悅欣然請其術·命解衣正臥·以爪甲畫其腹並臍下·應手水流·溢於榻下·宿腫即消·又探藥一餅如彈丸大·色正黑·戒曰·宜取商陸根與菘豆·同水十碗·煮至沸·去其滓·任意飲之·藥盡則病癒矣·兼師壽可至八十五歲·悅愧謝數四·且詢其姓氏鄉里·曰·我回客也·臨安人·又曰·和尚·如今世上人識假不識真·語訖·揖而去·悅如言飲藥·味殊甘美·越兩日乃盡·病如失去·亦不復知客為何人·後兩月·別一客言來從都下·因觀補陀山觀音至此·出一卷畫贈悅曰·此我所為者·即去·既而展視之·乃畫薛荔纏結中覆呂真人象·始知所謂回客者此雲·縣主簿趙彥清為作記·

## 粉縣主

宗室郇康孝王仲御孫女·曰粉縣主者·年十四五時·與家人會飲於堂·忽大風從庭起·雷雨繼至·火光如毬·縱橫飛掣·煙霧四合·對面不相睹·男子號哭乞命·婦人掩耳僕卓上·或有墮地者·移時方止·天晴如初·點檢坐中人·獨不見縣主·久之·但得雙目睛於庭砌下·屍失所在矣·縣主之父曰土驪·

## 耿愚侍婢

大觀中·京師醫官耿愚·買一侍婢·麗而黠·逾年矣·嘗立於門外·小兒過焉·認以為母·眷戀不忍去·婢亦拊憐之·兒歸告其父曰·吾母乃在某家·時其母死既祥矣·父未以為信·試往殯所視之·似為盜所發·不見屍·還家攜兒·謁耿氏之鄰·密訪婢姓氏·真厥妻也·即佯為販鬻者·徘徊道上·伺其出而見之·妻呼使前·與敘別意·繼以泣·語人曰·此為吾夫·小者吾子也·耿聞之怒·詬責之曰·去年買汝時·汝本無夫·有契約牙僧可驗·何敢爾·夫訴諸開封·跡所從來·婢昏然不省憶·但云·因行至一橋·迷失路·為牙媪引去·迫於饑餒·故自鬻·牙媪亦言實遇之於廣備橋·求歸就食·遂鬻以償欠·京尹不暇究始末·命夫以餘直償耿氏·而取其妻·耿氏不伏·夫又訴於御史臺·整會未竟·復失婦人·訟乃已·不一年·耿愚死·家亦衰替·

## 江氏白鶉